



SURUHANJAYA PILIHAN RAYA MALAYSIA

## KENYATAAN MEDIA

BIL. 74 / 2019

### **URUSAN PILIHAN RAYA KECIL (PRK) PARLIMEN P.165 TANJUNG PIAI, JOHOR**

1. Suruhanjaya Pilihan Raya Malaysia (SPR) pada 23 September 2019 telah menerima pemakluman rasmi daripada **Yang di-Pertua Dewan Rakyat, YB Tan Sri Dato' Mohamad Ariff bin Mohd Yusof** berhubung dengan kekosongan luar jangka kerusi **Parlimen P.165 Tanjung Piai, Johor** berikutan kembalinya ke rahmatullah penyandangnya, **Allahyarham YB Datuk Wira Dr. Md Farid bin Md. Rafik** pada 21 September 2019.
2. Sehubungan dengan itu, SPR telah mengadakan Mesyuarat Khas pada hari ini dan menetapkan bahawa satu Pilihan Raya Kecil (PRK) perlu diadakan dalam tempoh 60 hari dari tarikh kekosongan yang dipastikan oleh SPR mulai pada 24 September 2019 bagi mengisi kekosongan di kerusi Parlimen berkenaan.
3. Bagi maksud menjalankan PRK ini, SPR telah menetapkan tarikh-tarikh penting seperti yang berikut :

<b>Hari Penamaan Calon</b>	<b>: 2 November 2019 ( Sabtu )</b>
<b>Hari Mengundi Awal</b>	<b>: 12 November 2019 ( Selasa )</b>
<b>Hari Mengundi</b>	<b>: 16 November 2019 ( Sabtu )</b>

4. Tempoh berkempen yang ditetapkan adalah 14 hari bermula selepas pengisytiharan calon sehingga pukul **11.59 malam, 15 November 2019**.

5. Bagi urusan permohonan undi pos luar negara dan dalam negara, tarikh buka dan tarikh tutup permohonan adalah seperti berikut :

<b>Tarikh Buka</b>	<b>:</b>	<b>1 Oktober 2019 ( Selasa )</b>
<b>Tarikh Tutup</b>	<b>:</b>	<b>31 Oktober 2019 ( Khamis )</b>

6. SPR akan menggunakan **DEWAN JUBLI INTAN SULTAN IBRAHIM, PONTIAN** sebagai **Pusat Penamaan Calon** dan **Pusat Penjumlahan Rasmi Undi**.

7. Borang Penamaan Calon boleh dibeli mulai 8 Oktober 2019 di Pejabat Pegawai Pengurus Pilihan Raya di Pejabat Daerah Pontian atau Pejabat Pilihan Raya Negeri Johor atau di Ibu Pejabat SPR Putrajaya.

8. Untuk memudahkan proses penamaan calon, saya menggesa kepada bakal-bakal calon yang ingin bertanding dalam PRK P.165 Tanjung Piai agar mengisi dan membuat semakan awal pengisian borang tersebut dengan pihak Pejabat Pegawai Pengurus atau Pejabat Pilihan Raya Negeri Johor sebelum Hari Penamaan Calon. Proses semakan awal ini boleh dibuat mulai 28 Oktober 2019. Selain itu bakal-bakal calon juga adalah dinasihat untuk membuat pembayaran deposit lebih awal. Ini bertujuan untuk memastikan semua proses penamaan calon pada Hari Penamaan Calon dapat diselesaikan lebih awal dan berjalan lancar.

9. Walau bagaimanapun, adalah diingatkan bahawa Kertas Penamaan Calon yang telah lengkap diisi dan disemak itu hendaklah dikemukakan oleh calon atau penyokong atau pencadangnya semasa Hari Penamaan Calon di Pusat Penamaan Calon yang telah ditetapkan oleh SPR.

10. SPR akan meneruskan penyiaran secara langsung proses-proses pilihan raya menerusi **FB Live** di laman Facebook SPR sebagaimana yang dilaksanakan pada PRK sebelum ini. SPR juga akan menyiarke kepada umum keputusan tidak rasmi PRK yang tertakluk kepada pengesahan melalui laman media sosial SPR, portal SPR dan juga paparan skrin di Pusat Penjumlahan Rasmi Undi.

11. Seramai **1,019 orang petugas** dilantik bagi mengendalikan proses PRK P.165 Tanjung Piai. Manakala sebanyak **28 buah Pusat Mengundi** yang mengandungi kesemuanya **127 Saluran** akan digunakan untuk kemudahan mengundi. PRK ini dianggarkan memerlukan peruntukan **sebanyak RM2.67 JUTA**.

12. Daftar Pemilih Pilihan Raya yang akan digunakan untuk PRK ini adalah **sehingga suku tahun kedua Tahun 2019** yang dikemaskini sehingga **23 September 2019**. Daftar Pemilih tersebut mengandungi **52,986 orang pengundi yang terdiri daripada 52,698 orang pengundi biasa, 280 orang pengundi awal dan 8 orang Pengundi Tidak Hadir (PTH) Luar Negara**. Daftar Pemilih tersebut akan mula dijual pada **16 Oktober 2019**.

13. SPR akan turut menghantar Kad Pengundi (*Voter's Card*) kepada semua pengundi di Tanjung Piai. *Voter's Card* ini mengandungi maklumat

Pusat Mengundi, Saluran Mengundi, Nombor Bilangan Pengundi, Tarikh dan Masa Pengundian. Ia akan memudahkan pengundi untuk mengetahui maklumat pengundian mereka dan melancarkan lagi proses pada hari mengundi.

14. Mulai tarikh 16 Oktober 2019 juga, para pengundi boleh membuat semakan Daftar Pemilih untuk mengetahui maklumat pusat mengundi, saluran mengundi dan nombor bilangan mereka melalui **laman portal SPR** ([www.spr.gov.my](http://www.spr.gov.my)) atau menelefon ke talian **03-88927018** atau melalui **SMS 15888** atau melalui **aplikasi MySPR Semak**.

15. Pada PRK ini juga, SPR turut menawarkan kepada mana-mana agensi Kerajaan, Pertubuhan Bukan Kerajaan (NGO), mana-mana badan atau individu berkelayakan yang berminat untuk menjadi pemerhati pilihan raya dalam melihat penjalanan proses PRK ini bermula dari hari penamaan calon sehingga keputusan pilihan raya diumumkan. Mereka dibenarkan untuk membuat pemerhatian seperti di pusat penamaan calon, pusat mengundi, tempat pengiraan undi dan pusat penjumlahan rasmi undi dan perlu mematuhi kesemua syarat-syarat pelantikan yang telah ditetapkan oleh SPR. Permohonan untuk menjadi Pemerhati Pilihan Raya Kecil ini boleh dikemukakan kepada SPR melalui emel [pilihanrayakecil@spr.gov.my](mailto:pilihanrayakecil@spr.gov.my) mulai hari ini dan tarikh tutup adalah pada **11 Oktober 2019**.

16. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen **‘Jom Kita Undi’** melalui pelbagai saluran media termasuk di

media elektronik, media sosial, media cetak, hebahan melalui siar raya dan pemasangan kain rentang di lokasi-lokasi strategik seperti di tempat-tempat tumpuan awam, hentian bas dan lain-lain tempat yang bersesuaian.

17. SPR mensasarkan **70 peratus** pengundi akan keluar mengundi. SPR juga memohon kerjasama semua pihak termasuk pihak media dan parti-parti politik agar turut mengambil langkah untuk menyeru dan menggalakkan pengundi supaya keluar mengundi.
18. SPR juga akan meneruskan penambahbaikan seperti berikut:
  - a) Menyediakan **DUA (2) saluran khusus** bagi pengundi yang berumur 60 tahun dan ke atas di setiap Pusat Mengundi.
  - b) **Memanjangkan tempoh masa pengundian** dari jam **8.00 pagi hingga 5.30 petang** berbanding jam 5.00 petang pada PRU-14.
  - c) Sebanyak 26 **saluran baharu** ditambah bagi mengelakkan jumlah pengundi terlalu ramai di satu-satu saluran menjadikan keseluruhannya adalah 127 **saluran** berbanding 101 **saluran** pada PRU-14.
  - d) Pengundi-pengundi Orang Kurang Upaya (OKU) akan mengundi di Saluran 1. Pada PRK ini seramai 981 **orang** pengundi OKU telah dikenal pasti dan mereka adalah berdaftar dengan Jabatan Kebajikan Masyarakat (JKM).

19. Maklumat-maklumat lain berhubung dengan pilihan raya kecil ini akan dimaklumkan dari semasa ke semasa oleh SPR.

Sekian dan terima kasih.

**DATUK AZHAR AZIZAN HARUN**  
Pengerusi  
Suruhanjaya Pilihan Raya Malaysia (SPR)

Tarikh : 1 Oktober 2019 / 1 Safar 1441H